

Матфеин 27 бөлг.

1. Өр цээж йовсн цагла Иисусиг үклин харт бэрүлхин төлө Бурхна ах эрүн улс болн оln медэтнр хург кеж .
2. Тедн Иисусиг бооһад, Понтий Пилат гидг толһачд күргв.
3. Терүг бэрүлж өгсн Иуда Иисусиг үкллэ харһулхинь медэд бийэн гемшэв. Эн һучн цаһан мөңгн деншг Бурхна ах эрүн улст болн медэтнрт өгэд келв:
4. «Би килнц уга цус бэрүлж бийэн бузрдчкв.» Тедн терүнд хэрү өгв: «Маднд юн болв? Эврэн хэлэ.»
5. Эн цаһан мөңгн деншгүд сүмд хаяд бийэн дүүжлж.
6. Цаһан мөңгн деншгүдиг Бурхна ах эрүн улс цуглулад келв: «Сүмд бээсн Бурхна зөөр тэвдг ормд эн деншүдиг тэвж болшго, юңгад гихлэ эн -цусна үнн.»
7. Эдн хоорндан селвцэд, делкэн һазр төгэлэд йовдг улсиг оршахин төлө эн мөңгэр шаврар кедг урчин һазр хулдж авна.
8. Тегэд тер һазр ода күртл «Цуста һазр» гиж нерэдгднэ.
9. Иеремиа гидг ээлдэчин келснь күцж: « Авсн һучн цаһан мөңгн деншг- эн Израилин көвүдин Терүнд өгсн унн,
10. тегэд тер мөңг шаврар кедг урчин һазрин төлө өгч гиж нанд Деед Эзн келлэ.»
11. Иисус толһачин өмн зогсчахла тер Терүнэс сурв: «Чи Иудеин Хан болжахмч? Иисус энүнд хэрү өгв: «Чи эврэн тиигж келвч.»
12. Бурхна ах эрүн улс болн медэтнр Терүг бурушажахла, Тер эднд хэрү өгсн уга.
13. Тиигхлэ Пилат Терүнд келнэ: «Кедү күн Чамаг гемшэхин төлө герчлжэхинь Чи соңсжанач?»
14. Иисус нег чигн гемшэлһнд хэрү өгсн уга, тегэд толһач йир икэр алң болж.
15. Паасхин сэн өдрлэ толһач бээсн авъясар эмтнэ дурар нег кү түүрмэс сулдхдг бээж.
16. Тер цагт Варрава түүрмд суусн бээж. Эн деермчиг дала эмтн меддг билэ.

17. Тедн цуглрхла, Пилат теднэс сурв: «Тадн кениг нанар сулдхар бээнэт: «Варравиг аль Христос гиж нерэддг Иисусиг?»»
18. Тедн үлү үзэд, Терүг бэрүлснь эн медлэ.
19. Пилат зарһд суусн кемлэ терүнэ гергн Пилатд ялчан тэвэд келүлж: « Тер үнн-чик седклтэ күүнд бичэ му ке , юңгад гихлэ би эндр зүүндэн Терүнэ көлтэ дала зовлң үзүв.»
20. Бурхна ах эрүн улс медэтнр оln эмтиг Иисусиг алтха гihэд, Варравиг болхла сулдхин төлэ суртн гиж тедниг күчэр иткүлв.
21. Тиигхлэ толһач теднэс сурв: « Эн хойрас тана дураp би кениг сулдхмб? Эдн келцхэв: «Варравиг!»»
22. Пилат теднд келв: «Христос гиж нерэддг Иисуcла би ю кехмб? Цуһар хээкрв: «Кирст хадтн!»»
23. Толһач сурв: «Ямаран му юм Эн кесмб? Болв эдн улм икэр хээкрлдв: «Кирст хадтн!»»
24. Цүүгэн улм икдэд, юн болв чигн нөкд болшгоһинь Пилат үзэд, эн ус авад, һаран уһачкад, цуг эмтнэ нүднд келв: «Эн үнн-чик седклтэ күүнэ цусн асхртха гиж би заксн угав, тегэд нан деер килнц уга. Эврэн медтн.»
25. Цуг эмтн хэрү өгв: «Терүнэ цусн мадн деер болв мана күүкд деер!»
26. Тиигхлэ Пилат Варравиг сулдхад, болв Иисусиг гөвдэд, кирст хадтн гиж закв.
27. Толһачин дээчнр Иисусиг преторийд орулчкв. Иисусин өөр цуг цергин дээчнр цуглрв.
28. Терүнэ хувцинь тээлэд, деернь хаана улан өнгтэ хувц өмскв.
29. Толһа деернь хатханчгар гүрсн титм өмскэд, барун һартнь бура өгв.Терүнэ өмн тедн өвдлгэд, эдн Терүгэр наад бэрэд, инэлдэд келв: «Иудеин Хан! Байрл!»»
30. Эдн Терүнүр нульмлдад, бура авад толһаһарнь цокцхав.
31. Эдн Терүгэр наад бэрснэ хөөн, улан өнгтэ хаана хувцинь тээлэд, көдрг деернь өмскэд, кирст хадулхар йовульв.

32. Нарч йовад эдн Симон гидг нертэ күүнлэ харһв. Эн Кириянэс билэ. Эдн энүг Иисусин кирс күчэр авч йовуль.
33. Тедн «Мацнан орм» нертэ Голгоф гидг һазрур ирхлэ,
34. Терүнд цөснлэ негдүлсн уксусиг күчэр уулһхар седж. Иисус амсчад, энүг уухар седсн уга.
35. Иисусиг кирст хадад, эдн жирв хаяд, Терүнэ хувц хоорндан хуваһад,
36. Терүг манад суула.
37. Иисусин толһа деер тедн эврәннь дурар гемшэжэх цас наалдулж. Эн «Иудеин Хан»
38. Терүнлэ хамдан хойр деермч күн бас кирст хадгдв: негнь - барун талас, хойрдгчнь - зүн талас.
39. Эн цагла хажуһарнь йовж йовсн улс толһаһарн Терүн тал зааһад, му келэд, хээкрлдэд бээв.
40. «Чи сүмиг хамхлад һурвн хонгин туршарт тосхв»- гиж келлэч. Кемр Чи Бурхна Көвүн болхла, кирстэс бууһад бийэн авр.
41. Бурхна ах эрүн улс, дегтр бичдг улс, медэтнр болн фарисеймуд наад бэрэд, инэлдэд келцхэв:
42. «Талдан улс аврдг, болв эврэ бийэн аврч чаддго. Кемр Тер Израилин хан болхла, кирстэс ода бууһад ирхлэ, тегэд бидн Терүнд иткхвидн.»
43. «Би – Бурхна Көвүн» Иисус гиж келдг билэлм. Иисус Бурхнд йир икэр нээлдг билэ, тегэд Бурхнд дурн бээхлэ, Терүг ирэд авртха» гиж тедн келцхэж.
44. Терүнлэ хамдан кирст хадгдсн деермчнр Терүг бас тиигж гемшэсмн.
45. Зурһан часас авн йисн час күртл цуг һазр деер харһу болв.
46. Йисн час болж йовхла, Иисус чаһур хээкрв: «Эли! Эли! Лама савахвани!» Тернь - эн: «Бурхн мини! Бурхн мини! Яһад Та Намаг үлдэвт?»
47. Тедн зогсжасн улсин зэрмнь энүг соңсчкад келцхэв: «Тер Илияг дууджана.»
48. Теднэс негнь дарунь гүүһэд, кенчриг уксусар норһад, бура деер бооһад, Иисусиг уутха гиж өгв.

49. Наадкснь келцхэв: «Илия ирж Терүг аврхий? Күлөжэтн, хэлэхм.»
50. Иисус хэрү чаңур хээкрхлэ, эмнь һарч одв.
51. Эн цагла сүмин көшг деерэс авн дора күртл тасрж одв, һазр чичрэд- чолуд хамхрв.
52. Оршалһна яршгуд секгдв, оln өңгрсн эрүн улс эмдрв.
53. Терүнэ эмдрлһнэ хөөн оршалһна яршгудас һарсн улс эрүн балһснд орад, дала эмтнд үзгдв.
54. Һазрин чичрлһ болн цуг болсн юм үзсн зун цергин ахлач, терүнлэ хамдан Иисусиг харжасн улс йир икэр ээлдэд келцхэв: «Эн йоста Бурхна Көвүн бээж!»
55. Иисусин ардас Галилеяс ирсн, Терүнд церглсн күүкд улс тенд бас бээһэд цугнь үзсмн.
56. Мария Магдалина, Мария, Иаковин болн Иосин эк, Зеведеин көвүдин эк тедн дунд бас билэ.
57. Иисусин сурһуль дассн Иосиф нертэ байн күн Аримафеяс асхн цагла ирж.
58. Эн Пилатур, ирэд цогц өгтн гиж сурж, Пилат цогц өгтн гиж закв.
59. Иосиф цогц авад, цевр, некмр эдэр ораһад,
60. Эврәннь уулын көндэд чавчсн шин оршалһна яршгт тэвв. Оршалһна яршг бээсн уулын көндөн үүдиг ик чолуһар тулчкад, Иосиф йовж одв.
61. Мария Магдалина болн талдан Мария оршалһна яршгин өмн суусмн.
62. Пятницин хөөн дарук өдрлэ Бурхна ах эрүн улс болн фарисеймуд Пилатын өөр цуглрад келж:
63. «Зерг! Эмд бээсн цагтан Тер худлчин келсн үг мана сананд орв: «Һурв хонад – эмдрхв.»
64. Тегэд һурвдгч өдр иртл, оршалһна яршгиг харултха гиж зак, юнгад гихлэ Терүнэ сурһульчнр сөөһөр ирэд, Терүг бичэ хулхалтха болн эмтнд тер үклэс эмдрв гиж бичэ келтхэ гihэд. Тегэд сүл худл түрүнк худлас му болх.»
65. Пилат эднд келв: «Таднд харулчнр бээнэ. Яһж медсэрн йовад харултн.»
66. Эдн йовад, оршалһна яршгин өөр харулчнр зогсаһад, чолунд тамһ тэвв.

